

Broj: 03-02-1219/2026
Sarajevo, 17.07.2026. godine

**PARLAMENT FEDERACIJE
BOSNE I HERCEGOVINE**

- Predstavnički dom -

- Dom naroda -
gosp. Tomislav Martinović, predsjedavajući

Poštovani,

U skladu sa članom IV.B.3.7.c) (III) Ustava Federacije Bosne i Hercegovine, a u vezi sa članom 172. stav (1) Poslovnika Predstavničkog doma Parlamenta Federacije BiH („Službene novine Federacije BiH“, br. 69/07, 2/08, 26/20 i 13/24) i članom 164. stav (1) Poslovnika o radu Doma naroda Parlamenta Federacije BiH („Službene novine Federacije BiH“, br. 27/03, 21/09, 24/20 i 60/24), radi razmatranja i usvajanja po skraćenom postupku, dostavljam Vam **PRIJEDLOG ZAKONA O IZMJENAMA I DOPUNAMA ZAKONA O PRAVIMA DEMOBILIZIRANIH BRANILACA I ČLANOVA NJIHOVIH PORODICA**, koji je utvrdila Vlada Federacije Bosne i Hercegovine na 71. sjednici, održanoj 16.07.2026. godine.

Prijedlog zakona se dostavlja na službenim jezicima i pismima Federacije Bosne i Hercegovine u printanoj i elektronskoj formi (CD).

S poštovanjem,



Prilog:

- Prijedlog zakona na bosanskom jeziku (CD)
- Tekst odredbi Zakona koje se mijenjaju i dopunjuju
- Obrazac IFP-DA
- Zakon o pravima demobiliziranih branilaca i članova njihovih porodica („Službene novine Federacije BiH“, br. 54/19, 29/22, 81/23 i 60/24)

Co: Federalno ministarstvo za pitanja boraca i invalida odbrambeno-oslobodilačkog rata
gosp. Nedžad Lokmić, ministar

Co: prd-rt

**BOSNA I HERCEGOVINA
FEDERACIJE BOSNE I HERCEGOVINE
VLADA**

PRIJEDLOG

**Z A K O N
O IZMJENAMA I DOPUNAMA ZAKONA O PRAVIMA
DEMOBILIZIRANIH BRANILACA I ČLANOVA NJIHOVIH PORODICA**

Sarajevo, juli 2026. godine

**PRIJEDLOG ZA DONOŠENJE ZAKONA O IZMJENAMA
I DOPUNAMA ZAKONA O PRAVIMA DEMOBILIZIRANIH BRANILACA I ČLANOVA
NJIHOVIH PORODICA PO SKRAĆENOM POSTUPKU**

Shodno članu 172. stav (1) Poslovnika o radu Predstavničkog doma Parlamenta Federacije BiH („Službene novine Federacije BiH“, br. 69/07, 2/08, 26/20 i 13/24) i članu 164. stav (1) Poslovnika o radu Doma naroda Parlamenta Federacije BiH („Službene novine Federacije BiH“, br. 27/03, 21/09, 24/20 i 60/24), predlaže se donošenje Zakona o izmjenama i dopunama Zakona o pravima demobiliziranih branilaca i članova njihovih porodica u svrhu uvođenja boračkog dodatka kao mjesečne novčane naknade demobiliziranim braniocima i članovima porodica poginulih ili umrlih branilaca koji su korisnici prava u skladu sa odredbama Zakona o pravima branilaca i članova njihovih porodica, a radi učestvovanja u odbrani Bosne i Hercegovine u periodu od 08.04.1992. godine do 23.12.1995. godine.

Imajući u vidu naprijed navedeno, kao i činjenicu da nije u pitanju složena i obimna izmjena zakona, predlažemo da se navedeni zakon donese po skraćenom postupku.

ZAKON
O IZMJENAMA I DOPUNAMA ZAKONA O PRAVIMA DEMOBILIZIRANIH
BRANILACA I ČLANOVA NJIHOVIH PORODICA

Član 1.

U Zakonu o pravima demobiliziranih branilaca i članova njihovih porodica („Službene novine Federacije BiH“, br. 54/19, 29/22, 81/23 i 60/24), u članu 4. stav (1) iza tačke p) dodaje se nova tačka r) koja glasi:

„r) borački dodatak.“

Član 2.

U članu 19. u st. (1) do (5) riječi: „prethodne godine“ zamjenjuju se riječima: „2024. godine, usklađene za sva pripadajuća povećanja.“

Član 3.

U članu 21. u stavu (1) riječi: „prethodne godine“ zamjenjuju se riječima: „2024. godine, usklađene za sva pripadajuća povećanja.“

Član 4.

Član 26. u stavu (1) tačka b) riječi: „prethodne godine“ zamjenjuju se riječima: „2024. godine, usklađene za sva pripadajuća povećanja.“

Član 5.

Iza člana 50. dodaje se novi odjeljak „r) Borački dodatak“ i novi čl. 50.a, 50.b, 50.c, 50.d, 50.e, 50.f, 50.g, 50.h, 50.i i 50.j koji glase:

„Član 50.a
(Pojam)

Borački dodatak u smislu ovog zakona je mjesečna novčana naknada demobiliziranim braniocima i članovima porodica poginulog ili umrlog branioca koji su korisnici prava u skladu sa odredbama Zakona o pravima branilaca i članova njihovih porodica, a koja se priznaju pod uslovima, na način i u visini propisanim ovim zakonom.

Član 50.b
(Uslovi)

- (1) Pravo na borački dodatak u smislu ovog zakona može ostvariti demobilizirani branilac pripadnik Oružanih snaga koji je učestvovao u odbrani Bosne i Hercegovine u periodu od 08.04.1992. godine do 23.12.1995. godine, najmanje 1

(jednu) godinu i članovi porodice poginulog ili umrlog branioca bez obzira na period učešća u Oružanim snagama, koji su korisnici prava u skladu sa odredbama Zakona o pravima branilaca i članova njihovih porodica.

- (2) Iznos boračkog dodatka za članove porodica poginulog ili umrlog branioca obračunavat će se za period od 08.04.1992. godine do 23.12.1995. godine.
- (3) Federalno ministarstvo će donijeti propis o načinu, uslovima i dokumentaciji potrebnoj za ostvarivanje prava iz člana 50.a ovog zakona u roku od 60 dana od dana stupanja na snagu ovog Zakona.

Član 50.c

(Utvrđivanje iznosa boračkog dodatka)

- (1) Lica iz člana 50.b ovog zakona mogu ostvariti pravo na borački dodatak u iznosu od 1,50 KM po mjesecu učešća u odbrani Bosne i Hercegovine.
- (2) Vlada Federacije BiH će odlukom vršiti usklađivanje mjesečnog iznosa boračkog dodatka.

Član 50.d

(Nadležnost za prvostepeno rješavanje)

- (1) Nadležna gradska/općinska služba za boračko-invalidsku zaštitu, prema mjestu prebivališta podnosioca zahtjeva, rješava u prvom stepenu o pravu na borački dodatak.
- (2) Po zahtjevu lica iz člana 50.b stav (1) ovog zakona koje ima prebivalište u entitetu Republika Srpska, o pravu na borački dodatak u prvom stepenu rješava najbliža gradska/općinska služba za boračko-invalidsku zaštitu u Federaciji BiH, u odnosu na mjesto njegovog prebivališta, vodeći računa o teritorijalnoj i komunikacijskoj pogodnosti.
- (3) Za lica iz člana 50.b stav (1) ovog zakona koja imaju prebivalište u Brčko Distriktu BiH, o pravu na borački dodatak rješava nadležna služba za boračko-invalidsku zaštitu Brčko Distrikta BiH.

Član 50.e

(Od kada se pravo priznaje)

Licima koja ispunjavaju uslove za priznavanje prava, borački dodatak pripada od prvog dana narednog mjeseca od dana podnošenja zahtjeva.

Član 50.f

(Odlučivanje po žalbi)

- (1) Protiv prvostepenog rješenja o pravu na borački dodatak dopuštena je žalba.
- (2) Žalba se izjavljuje u roku od 15 dana od dana dostavljanja rješenja.
- (3) Po žalbi izjavljenoj protiv prvostepenog rješenja odlučuje Federalno ministarstvo.
- (4) Protiv rješenja donesenog po žalbi, može se pokrenuti upravni spor kod nadležnog suda.

- (5) Prvostepeno rješenje podliježe reviziji. Reviziju obavlja Federalno ministarstvo. Revizija odlaže izvršenje rješenja.
- (6) U postupku revizije Federalno ministarstvo može dati saglasnost na prvostepeno rješenje ili ga poništiti ili ukinuti i samo drugačije riješiti upravnu stvar.

Član 50.g
(Prestanak prava na borački dodatak)

- (1) Pravo na borački dodatak prestaje smrću korisnika prava.
- (2) Pravo na borački dodatak ne može se prenijeti na drugo lice.
- (3) Član uže porodice korisnika prava dužan je u roku od 15 dana od dana nastanka promjene prijaviti prvostepenom organu promjenu koja utiče na prestanak prava.
- (4) Prvostepeni organ će po službenoj dužnosti na osnovu prijave ili saznanja na drugi način o razlogu za prestanak prava, donijeti rješenje o prestanku prava, sa posljednjim danom mjeseca u kojem je nastupio razlog za prestanak prava.

Član 50.h
(Način isplate i izvještavanje)

- (1) Novčana sredstva za ostvarivanje i korištenje prava na borački dodatak za lica iz člana 50.b ovog zakona osigurat će se u Budžetu Federacije BiH.
- (2) Prvostepeni organ vodi kompletnu evidenciju o korisnicima koji ostvaruju pravo iz člana 50.a ovog zakona.
- (3) Federalno ministarstvo vodi evidenciju o izvršenim isplatama i o tome kvartalno izvještava Vladu Federacije BiH.

Član 50.i
(Povrat sredstava)

- (1) Lice kome je isplaćeno novčano primanje prema ovom zakonu na koje nije imalo pravo, dužno je vratiti primljeni iznos.
- (2) U slučaju smrti lica iz stava (1) neosnovano isplaćeni novčani iznos boračkog dodatka dužni su vratiti njegovi nasljednici ili pravni sljednici.
- (3) Za nepravilne isplate koje su nastale kao greška organa koji je vodio postupak, nepravilno isplaćena sredstva nadoknadit će organ koji je učinio grešku i odgovarajući iznos će vratiti u Budžet Federacije BiH.

Član 50.j
(Kontrola namjenskog trošenja sredstava)

Federalno ministarstvo vrši inspekcijski nadzor i kontrolu namjenskog trošenja sredstava namijenjenih za ostvarivanje prava na borački dodatak.“

Član 6.
(Stupanje na snagu)

Ovaj zakon stupa na snagu narednog dana od dana objavljivanja u „Službenim novinama Federacije BiH“.

O B R A Z L O Ž E N J E
PRIJEDLOGA ZAKONA O IZMJENAMA I DOPUNAMA
ZAKONA O PRAVIMA DEMOBILIZIRANIH BRANILACA I ČLANOVA NJIHOVIH
PORODICA

I - USTAVNI OSNOV ZA DONOŠENJE ZAKONA

Ustavni osnov za donošenje ovog zakona sadržan je u članu III.2.e), u vezi sa članom III.3.(3), Ustava Federacije Bosne i Hercegovine, prema kome federalna vlast, kada se radi o zakonima i drugim propisima koji su obavezujući na području cijele Federacije Bosne i Hercegovine, ima pravo utvrđivati politiku i donositi zakone u oblasti socijalne politike.

Dakle, imajući u vidu citiranu ustavnu odredbu, federalna vlast ima pravo utvrđivati politiku i donositi zakone i druge propise koji su obavezujući na području cijele Federacije Bosne i Hercegovine, bez prethodne saglasnosti kantona.

II - RAZLOG ZA DONOŠENJE ZAKONA

Razlog za donošenje Zakona o izmjenama i dopunama Zakona o pravima demobiliziranih branilaca i članova njihovih porodica („Službene novine Federacije BiH“, br. 54/19, 29/22, 81/23 i 60/24), je uvođenje boračkog dodatka kao mjesečne novčane naknade demobiliziranim braniocima i članovima porodica poginulog ili umrlog branioca radi učestvovanja u odbrani Bosne i Hercegovine u periodu od 08.04.1992. godine do 23.12.1995. godine. Rješenjem Vlade Federacije BiH, V. broj: 117/2025 od 13.02.2025. godine imenovana je Radna grupa za izradu teksta Nacrta zakona o izmjenama i dopunama Zakona o pravima demobiliziranih branilaca i članova njihovih porodica, koja je utvrdila više načela/principa. Jedan od principa je da je pravo na borački dodatak jednako za sve pripadnike Armije RBiH, HVO-a, MUP-a RBiH, te da se isplaćuje u istom iznosu na cijelom teritoriju BiH. Pravo na borački dodatak u smislu ovog zakona može ostvariti demobilizirani branilac pripadnik Oružanih snaga koji je učestvovao u odbrani Bosne i Hercegovine u periodu od 08.04.1992. godine do 23.12.1995. godine, najmanje 1 (jednu) godinu i članovi porodice poginulog ili umrlog branioca bez obzira na period učešća u Oružanim snagama, a koji su korisnici prava u skladu sa odredbama Zakona o pravima branilaca i članova njihovih porodica. Radna grupa je na sastanku od 23.09.2025. godine usvojila zaključke kojima je utvrđeno da prema podacima IDDEEA-e i evidencijama Federalnog ministarstva pravo na borački dodatak bi imalo 383.494 korisnika, te je predložila da se iznos boračkog dodatka utvrdi u iznosu od 1,50 KM po mjesecu učešća u Oružanim snagama RBiH. Procijenjeni godišnji iznos isplate boračkog dodatka iznosi 234.700.000,00 KM, te da će se navedeni prijedlog dostaviti Vladi Federacije BiH, radi daljeg razmatranja, usaglašavanja i zakonskog utemeljenja.

III - POJAŠNJENJE POJEDINIH ODREDBI

Članom 1. – U članu 4. koji definiše prava demobiliziranih branilaca dodato je novo pravo „borački dodatak“.

Član 2. – Izmijenjen je član 19. u pogledu propisanih uslova za ostvarivanje prava na novčanu egzistencijalnu naknadu na način da je propisano da se pravo na novčanu egzistencijalnu naknadu može ostvariti ukoliko su mjesečni prihodi manji od 50% isplaćene minimalne penzije u Federaciji BiH za decembar 2024. godine, usklađene za sva pripadajuća povećanja na dan ostvarivanja prava.

Član 3. – Izmijenjen je član 21. Zakona u dokazivanju visine prihoda za ostvarivanja prava na egzistencijalnu novčanu naknadu.

Član 4. – Izmijenjen je član 26. Zakona kojim se definiše prestanak prava na novčanu egzistencijalnu naknadu.

Članom 5. – Propisano je da se iza člana 50. dodaje novi odjeljak „r) Borački dodatak“. U okviru novog odjeljka „r) Borački dodatak“ dodati su novi čl. 50.a, 50.b, 50.c, 50.d, 50.e, 50.f, 50.g, 50.h, 50.i i 50.j. Navedenim članovima propisani su uslovi, postupak i način ostvarivanja prava, utvrđivanje prava kao i nadležnost za postupak revizije i rješavanja u drugostepenom postupku po žalbi. Također, navedenim članovima je propisan način isplate i izvještavanje, povrat sredstava i kontrola namjenskog trošenja sredstava.

Članom 6. – Propisano je stupanje na snagu Zakona.

IV - FINANSIJSKA SREDSTVA POTREBNA ZA PROVOĐENJE OVOG ZAKONA

Za provođenje ovog zakona u Budžetu Federacije BiH za 2026. godinu potrebno je obezbijediti dodatna finansijska sredstva u iznosu od 234.700.000,00 KM.